

حاتم مرعي

بِسْمِ اللَّهِ
عَلَى شَعْبِ جَعَان

بسكوتة على شعب جعان

شعر

حاتم مرعى

وزارة الثقافة



تعنى بنشر الأعمال الإبداعية
لمبدعى مصر المتحقيقين

• هيئة التحرير •

رئيس التحرير
سيد الوكيل
مدير التحرير
سعيد شحاتة
سكرتير التحرير
محمود أنور

الآراء الواردة في هذا الكتاب لا تعبر بالضرورة عن توجه الهيئة
بل تعبر عن رأي المؤلف وتوجهه في المقام الأول.

• حقوق النشر والطباعة محفوظة للهيئة العامة لقصور الثقافة.
• يحظر إعادة النشر أو النسخ أو الاقتباس بأية صورة إلا بإذن
كتابي من الهيئة العامة لقصور الثقافة، أو بالإشارة إلى المصدر.

سلسلة

حروف

تصدرها
الهيئة العامة لقصور الثقافة

رئيس مجلس الإدارة
سعد عبد الرحمن
أمين عام النشر
محمد أبوالمجد
مدير عام النشر
ابتهال العسلى
الإشراف الفنى
د. خالد سرور

• بسكوتة على شعب جعان
• حاتم مرعى
• الطبعة الأولى
الهيئة العامة لقصور الثقافة
القاهرة 2014م
• تصميم الغلاف،
د. خالد سرور
• المراجعة اللغوية،
أحمد سراج
• رقم الإيداع ٧٠٦٨ / ٢٠١٤
• الترخيم الدولى، 8-683-718-977-978
• المراسلات:
باسم / مدير التحرير
على العنوان التالى، ١٥ شارع أمين
سامى - قصر العيني
القاهرة - رقم بريدى ١١56١
ت، 2794789١ (داخلى، ١80)

• الطباعة والتنفيذ،
شركة الأمل للطباعة والنشر
ت، 23904096

بسكوتة على شعب جعان

لكل اللي شافني وما عرفنيش
واللي عارفني وما شافنيش
من قلبي
ورده
بتدبل
ومن عيني
دمعه
بشوكها.
• •

ما عنديش اللي اخجل منه

كمان

ما عنديش اللي افتخر بيه.

• •

- وزعت كلمة حبيبي

على كل الناس

أنا

أعوذ بالله

زيت المحبه الخام

فاضل لي دقه واموت.

صدقتي قلبي النهارده.

• •

مدمن مذكرات
كل ليله
ورقة نتيجة طائره بأفكاري
عمري راح فى الهوا
صوابي ناقصه عُقلتين
وقلبي زايد
دقه

خلطة دموع نشفت
كل ليله
ياخذها الهوا.

• •

حسي في الدنيا
شقيت عيوني بموس
سلكت وداني
بعود كبريت
آخره
قُطنه.

• •

باقي صوابي
طاروا
ورا وجبة كنتاكي
باقي لحمي
مفروم في الخلط
عاش
واللي حوالي أشباح
من لحم ودم.

• •

أزمة ورق
خلتني اطيوع الأرض
غير كده
عيد ميلادي
قبل الليله ما تقلب
هزيمه بطعم الفوز
قُلتُ لنفسي
أزمه
وهتعدى.

• •

لا ظهرت على أعراض انسحابيه
ولا قادر أنفذ خطط الهجوم

ورقه

أخف من دماغي
فكت حزام الأمان
وعملت مركب
بتغرق.

• •

بايته معايا
لقطات من حزن قديم،
كوابيس قديمه،
ريحة ملايكة
ولادي
ما لحقتش أحضنهم
سيبتلهم
بوسه فى الهواء،
ضحكه ع الترابيزه
وع الباب
وش
بلاستيك.

• •

عربية الصحافة فتحت قلبها

كل الجرايد

والمجلات

والكتب

نزلوا أسرى

متكتفين بالدوياره

تباع عربية الصحافة حررهم

بمطواه قرن

أخيراً عرفت حظي

(يوم أحداثه سريعه).

• •

بسكوتہ
على شعب جعان
تساوي إيه
وقفتي
في إشاره خضرا
عطلت مرور المشاه
في شوارع جانبية من عقلي
لأ وکمان
قلبي
عطل.

• •

لبه. صيني موفره

اتحرقت

حته مني

صبحت مالقتهاش

دورت

مفیش

غير ضحكه شاره

للاك مجروح.

• •

(غريق على أرض صلبه)

لا الأرض شربت دموعي

ولا لي في العوم

طاير

بس حاسس بخنقه

وان السما

ضيقة.

• •

باغطس واقب
زي حلم حقيقي .

• •

غمس عيشه الناشف

بالمح

بس داق واستطعم

غلطتي

إني سحبتة معايا

في رحلة بحث

عن مناجم الذهب

في الصمت الرهيب

قال إيه

• •

البحر
طحيته
والموج
كذب أبيض
والجبل
مش ممكن يصحى
م النومه الأبدية..

• •

قال

إني شيلته على كتفي

رقصته

في الحتت الضلمه

لحسته الحنضل

سفته تراب

ويا ما قال

بس ما صدقتوش

لساني

وانا عارفه.

• •

رَفَعْتَ رَاسِي

طَارَتْ

مَا لِحَقَّتْهَا ش

عِشَانِ مَطْبَاتِ الْهَوَا

وَعِشَانِ الطَّيَارَاتِ

تَعْدِي بِسَلَامٍ

وَعِشَانِ مَا عَلَا

وَأَعْلَا

وَأَعْلَا

كَانَ لَازِمٌ

أَرْفَعَهَا.

• •

زهرة الصبار
اللي ياما رويتها بالدموع والعرق
قررت تدبل
تعتذر لباولو كويلهو
عن حاجاته اللي مابتكملش
بالقرب
من جبلاية النار
جلست وبكيت.

• •

مرت علي
جيوش م الكلاب
والعقارب
وحرامي الحله
ماخوفتش
إلا من خيالي.

• •

أنا وطفل الجنائين
توأم ملتصق
بس روحنا مش واحده
كل روح اختارت الشجره اللي ترتاح لها
وجسمنا متكوم
من قطعة تفاح
لبناني.

• •

كل ما اقول

خلاص

هانت

من أول جديد

باتكعبل

ما بين قلبي وعقلي

رسول

ما بين عقلي وقلبي

سلمه

مكسوره.

• •

نايم وقايم
على كسل لذيد
وسط شخير الناس
اللي هتصحى بعد شويه
تشق ريقها
بساندوتشات الأسمنت المسلح
باشرب عصير. قصب ع الريق

• •

وانشِ دباني
على قهوة البرلمان
اللي اتفككت
ونامت في الإسعاف
من جرعة حنان زياده
نايم
ميدان الأربعين
مستحلي نومته.

• •

على نفس التروسكل
بيقاوح مع البلديه
صباح الخير يابور توفيق
مدرسة آمون وجهت له نيرانها
ونادي الموظفين
فرض حصاره
حتى الجنينه الفرنساوي
وزت عليه غريبتها .

• •

خط وهمي

مع نفسه

ماشي

عامل انه راكب عربيه دبابه

وداخل سباق

علشان يعجب البلديه

ويعجب الباشا

وكانتين المدرسه يشتغل

والكل يشتغل

الكل

إلا عم محمد .

• •

لا حزام على وسطي
ولا زلطة تحت لساني
واقف
وقفة عصفوره
على سلك الكهريا
بالف رقبتني
لغة اليومه
مش شايف تحت مني
قفص صدري اتفحم
مع إن الليله
خلصت.

• •

عيني اليمين مفتوحه

على لقطه همدانه

عيني الشمال

بتلعب الرفه

وشي براد شاي

من غير غطا

نازل من ع النار

خلاتي بسخونتي

لحد ما اتبخرت .

• •

بأى لون اكتب الشعارات

وعلى أى سور

دابت أفكاري الثوريه

فى سحابه سودا

شربتها

استكفيت

كتبت بدم ملوث

على حيطان الهوا

كفايه.

• •

من قدم ابو تريكه
لدماع المدرب
كاس مطوحني
الأسد المرعب
بقى في المظالم
عودت روي
ع التمثيل - المشرف -
وعودت وسطي
ع الرقص
في الدرجة التالته
بس لوالاقي تذكره.

• •

مصر كسبت
أنا خسرت
مش أزمه
لسه دموعي فى بيتها
ع الرجاله اللى ماتوا فى الحرب
والحریم
اللى نسيت.

• •

خيالي ناقص
زى ما اكون
ماشي على رُكبي
رجليّ مخاصماني
وعيني بتحلم
بالجنه
فوق الأرض.

• •

رجلي مش راضيه تصالحنى

بفسحه للهرم الرابع

بسهره حمرا

تحت سلم عماره

بقرش دفيان

أنسى خجلي

وعُقدي

وصوت ضميري

واعيش.

• •

قاعء فى برءى الهوائى

بمزاج ءموى

باعزف لءن الءلوء.

• •

دَخَلَةُ الْعَقْرِب
مَحْسَسَانِي بِالْمَلَل
الْأَجْنَدَه مَش زَحْمَه
وَالْعَذْرَاء
مَش هَتْنَجَز مَعَايَا
الْقَمَر
نَازِل شَوِيَه
أُمُورِي هَادِيَه
وَالْحُكُومَه
بِتَقْشَر بِصَل
وَأَنَا طَبِيعِي بِأَهْرَب
مِ الدَّمُوع
الَّتِي مَش مِنْ قَلْبِي.

• •

فى ضلّمة جيبى
مظاهره صامته
طيرت الباقي فى كارت الشحن
صورتي فى الابتدائيه
اكتفت بالبراءه
من جرايم
كان نفسي ارتكبتها
الرقم القومى همس
للجنّيه الذكرى
يستخبى
ورا دفتر الشيكات.

• •

روحي
قررت تختار
جسم أخف
وأنا داخل بتقلي
أعرف على دوري
في طابور العيش
روحي شنة بشلن
جسمي
كتلة جليد
بتدوب
وتتبخر
والكلمة
اللي وقعت م المحفظه
لسه بتناضل.

• •

طير الحريه الجريح

في البلاد النايمة

اسمه

الشعر.

• •

قصيده

انفجرت في بطني

طلعت من نغاشيشي

دخان ملون.

• •

شمس طالعة م البحر
اختارت ألوانها
باحاول احكي مع اللؤلؤ
واعيش
مع (همس الأمواج).

• •

خلطة النهارده
دمعة تمساح،
بجنينه لبيان ذكر،
جرام سعادته
والربع اللي فاضل
في بطارية عقلي.
● ●

اتمنيت ومانولتش
اعتزل الوظيفة الميري
ابقي كناس حُر
اكوم الناس بمقشه
واسيبيهم في الطل
ومن ندا الضجريه
آجي الاقيهم صافيين
وبيلمعوا.

• •

رجل ع الشط

والثانيه

فى أعماق البحر الأحمر

التالته

جاري البحث عنها

جايز

تشعلقني العروسه

اللي اتشعلقت قبل كده فى سنارتي

وانا بأصطادع البر

جايز

اتحول لشجرة موز

فى جزيرة قرود.

• •

نجوم وقعت
وانا ماشي ع الميه
قمر بيعيط
ورايا
ابو القمصان
على كتفي
نورس يتيم
وتحت رجلي
دنيا
بتختفي.

• •

قعدوا الحزانى

وانا

فى آخر اللمه

مستنى

النخله الذكر

تطرح.

• •

وانا بابكي
ع اللين المدلوق
نزلت دموعي
يادوب
قشطة.

• •

النُصُ الفاضي من الكوبايه

شريني

فلتر سيجارة اتحرق بين شفايفي

ماحستش

عقلي اتوسع

و قلبي

بارد.

• •

فاصل

ولن أعود

غير بريحانه م الجنه

مشاوير

م العين

للقلب

غرقت

في الكلام الحلو والطيبه

بادور

مش لاقى

• •

قلبت محطات الدش
ولا مُزه م المنزل
نطت م الشاشة
وقعت فى حجري
دفعت عمري
قسطت الباقي
واستعديت برُبع حبايه زرقا
عشان احتل أمريكا
والعب
فى أفكارها.
• •

قلبي اتزحم
بأسامي نسيته
صوت قطر بعيد
لزوم التكتكه
إيقاع العالم
مهزوز
وانا
جثه
على كنبه
في المستقبل.

• •

مستسلم
لرطوبة عضمي
التي سمحت لخيالي
باستقبال الذكرى
وكشفت
عن جروح مدفونه
وعيال
ماتوا
في ضهري.
• •

قصيده م الجاهليه
حياه متعاشه قبل كده
وراس نقرتي
وده حلفان يحاسبني عليه
فراعنة مصر
هارمي نفسي في بحرها الهايج
يمكن أطلع
بكلمة تنفعني .

• •

حاجه زي طرقة الصواب
ومصر اللي لازم تعيش
بدل ماهي حاطه إيديها على راسها
وأبو الهول متتح
" هكذا تنام التماثيل على الدوام بعيون مفتوحة
جملة لقيتها راكبه على نهضة مصر
دوبتني في اللون .

• •

مع حزن نجيب الريحاني
وسيجارة يوسف إدريس
ونضارة طه حسين
لقيت منديل أم كلثوم
غرقان آهات .

• •

محشور

مع سرب طيور جارحه

في نفق ضلله

بين جلدي وعضمي

روح

مش ناويه تغامر

بالطلوع

في البرد.

• •

الزمن بيُمُطني
ضحكه طويله
من غير سبب
اقاملتني زهرة الخشخاش
شافت روعي بتطلع
علي سرير فان جوح.

• •

سامع
عبد الحميد الديب
بيسأل دارون فى حق النشوء
وعطية عليان
بيندب حظه
مع كسر القرامطه
شاي ف نفسي
نبت شيطانى
فى صحرا
ربنا اللى خلقها.

• •

اشتكتلي الرفوف
من دوشة الكُتب
وصمت البيانو اللعبه
وانا اشتكيت
لله
من قُصر النظر
وصوت ال دي جي
في حنه سويسى
للصباح
حنه سويسى
للصباح...
● ●

ضنيت

الحكاية المعجزة

لما الخروف

نطح الجمل

قمت من كسفتي

مش جمل غضبان

لأ

مواطن أخرس

في بلاد الكلام.

• •

شكوى تانيه

من رفوف كشك سجائر في الساحل

من خفة المارلبورو الأبيض

وتُقل الكليوباترا

وتهريج المعسل

وضحكة لافاش كيري

م النسخة الكدابة لكيس المولتو

اشتكت

للميزان الحساس

م الصنف الناقص.

• •

تراب المحيطه
نفسه يعفر دقني
مستني حبة هوا
لو سمحت الفرصه
سلك اللمبه
هَيشنُقُ خيالي.

• •

لما هربت المزيكا
من شباك الحمام
وصوت الحنفيات
ابتدا في الهمس
حييت القاعده العريضه
وجمهور النمل في دماغه
حييت نفسي في المرايا
وكتبت على بخارها
الحريه
هنا.

• •

اتفطيت
وأفكاري عريانه
اتدفيت
وأطراي في بردانه
بافكر اركن
على حيطه بشر
واغني
للحرية.

• •

الحرية

شجره بيرونها الدم

تمثال في أمريكا

مدرسه إعداديه في شبرا

أنا فاكركويس

الحرية

قهوه في باب اللوق

قعدتها تخنق.

• •

مش وردہ بلدی
فی بستان الحریر
أنا
قلہ مملحہ
علی غطا زیر
فاضی .
• •

على باب قصر الشوق
مستنيها
مابتجيش
لو عدت من غير ماشوفها
كنت شميت ريحتها
اتأخرت
بس جايه لابد
جايز تكون اكتشفت
طريق أبعد
بس أمان
أواني
مستني وهم .

• •

محتاجها حالا
تقابلني ع الكورنيش
على ما طرد العفاريت
تكون اتخلصت من بقايا الخوف
اقوم
أفتح كاميرا الموبايل واستعد
نعيش مشهدنا الرومانسي
لا في أيديها طوبه
ولا في أيدي
إزازه مولوتوف .

• •

نفس الركن القديم
اللي شايلى صورها
إيه اللي كان بيتغير
غير إيدين بتسقف
وعيون بتسرح ورا المزيكا
وحاجه جوايا بتتفرد وتكش
ساعات تبقي ذكرى
ساعات تاخدني من إيدي
ترقص معايا .

• •

هي بعينها
بتسند راسها علي دراعي
وانا باسقيها كباية العصير
هاثقف على رجل واحده
وتبدأ تلف
فستانها الدانتيل
طيره الهوا
وأخر بخره في إزازه الكلونيا
سرحت في جسمها .

• •

اللي سابتني وهريت
من نص اللعبة
كان نفسي أدوق مرارتها
واموت زيها
م الضحك .

• •

ضحكة ماتت على دراعي

كان لازم اشرب

وانسى

إني صفر وبادور

فى المحيط الرأس مالي

بعد خسارتي

فى بورصة الأحلام

لما كنت حوت

باشعبط العيال

على ضهري.

• •

الحلم من أوله
عكس اتجاه الريح
الموج مغطيني
على راسي بطحه
ولما صحيت
لقيتها نكسه .
• •

الحلم من نُصه
ريح قويه
موجة ما تتركبش
شارع بعيد
وانا
ضله مكسوره
على شط ناز .

• •

الحلم من آخره
فواكه بحر
سفينة في الغاطس
عقدة لسان بتنفك
علم بيرفرف
لوجز صاحي
سرمبئه ناشفه
موجة بشر
بتغير المنظر .

• •

مش قادر أنسى
كلام دايب
فوق مرارة لساني
بيوت
صناديق
شوارع
مسامير
واني باقبض ع الجمر
بأحاول
أستطعم مرارتي.
• •

سَلِمَ خَشَبٌ
بِالْعَافِيَةِ وَقَفَ
فَرْدَةٌ جَزْمُهُ
خَافِيَةٌ تَمْشِي لَوْحَدِهَا
نَظَرِي تَحْتَ
عَقْلِي فِي رَجْلِي
وَنَازِلٌ
زَرْعُ بَصْلِ.

• •

قصف جوي عنيف
مدينة علي أطراف روعي
دماغي طائره على مهله
كده كده هاتعلق على أي بوابه
مش محتاج م العالم
غير حبة هدوء
أعيد ترتيب أعضائي
بجسمي النص عمر
اللي شايله
لآخر النهار.

• •

بحر

غابة

غريق

ولا الديب هياكلني

من على سريري

في حي السحاب

باصص بعيون قُط وديع

لديتي الواسعه.

● ●

خيالي مرعوش وببهرول
- ايه اللي بينسحب مني ؟
سؤال ملح من جسمي المهدود.
• •

يوم معدي
يهز في اكتافه
خلاني أفوت
على بوابات صدت
بيوت في حضن الأرض
والشارع
مش واخد باله .

• •

سلك الشبردق اللي حوالين دماغى

مش هيحميني

من غاز الأعصاب

وقنابل الأفكار الذكيه

خلينى

متحصن بالهوا.

• •

عَمِلْتُ طَيَّارَهُ
مِنْ غَيْرِ طَيَّارٍ
رَمَيْتُ وَدَانِي
لِصَوْتِ الطَّبِيعَةِ
فَتَشَّتْ فِي قَلْبِي
عَنْ مَعْنَى الْوُجُودِ
قَرَبْتُ

• •

- م الحفره البرميلييه -

خلاص

لا هاتصادم مع حد

ولا اتورط

فى

حرب

كلام.

• •

نور متكوم

نوم متقطع

عيوني

اللي ياما واجهت الأشباح

ويصت لهم من فوق

مغمضه

وعامله نايمه.

• •

قلبي

سامع طشاش

الحيوان الناطق اللي ركب وداتي

نزل ولا تسه

الأرض..

مفروشه رمل ؟

• •

أنا..

باتردم ؟

نظري هنج

نور عیوني

مش قادر یشوفني.

• •

في لون السما
والبحر الأحمر
في الشاي الثقيل
والسجاير السخنة
من كشف البركة
من نظر أطفالي
في شوارع مصر
من شحمي ولحمي

• •

وحروف اسمي
في بئر الحرمان
تحت الكباري
فوق شبكة عنكبوت
في التكرار
وحروف الجر
في ضلمة روعي
ساقط
ساقط
ساقط .

• •

هزتني يا جبل يا عجوز

كفايه عياط

قوم

نفض لنفسك

وانا

هالملم أشلائي

م العين السخنه

وجايلك طيران..

• •

عيب عليك
تنزل لمستوى البحر
تنكسر بالشكل ده
ده يادوب
ريح وعدت
يقولوا عليك إيه
عمال محاجرك

• •

وتودي وشك فين م المطايريد

عيب عليك

نزلتني من فوق

غرققتني معاك

والبحر

مش ناقص

دموع.

• •

على بحر ميت
ولا فى حزن جبل بيعيط
رمياني وخلص
بتقول إيه
إني شايها وزاعق
هيّ اللي كوياني ياعم
قولها
تراعي التلت الأخير
فى عمري
تحترم شيبتي
ده أنا حتى ضيف..

• •

قولها
تكبش من حظها
تحدفني
وانا القف
تنيمني على أرض سخنه
أسقعه
تضحكلي
أضحك لها من قلبي
أبقى لا قلقان
ولا خايف
أبقى حر.

• •

بطنت حيطاني بالصمت

طرطشتها بالجنون

صوتي ما وصلنيش

الأشباح اللي ظهرت

عملت زي الناس

لما صعبوا علي

• •

غنيت لهم بالإشاره
رقصت لهم بالسكاكين
ودبحت نفسي
اتفضل
معايا نص روح
هيّ اللي شايلا ني

• •

ما عرفتش
أصبر نفسي
بنهايه سعيده
بدمعتين فرح
مات الكلام
• •

اسمحو لي اتبخر
اخطف م القمر بوسه
واقطف غيومى
اعملها عُقد
وافرطه بهدوء
ع اللي باحبه.

• •

حاتم مرعى

صدر للشاعر

- لقطات من حزن قديم سلسلة إبداعات ٢٠٠١
الهيئة العامة لقصور الثقافة.
- كوايس قديمة مكتبة الأسرة ٢٠٠٤.
- ريحة ملايكه... كتاب الرسم الإبداعي ٢٠٠٩
دار إيزيس للنشر.

تحت الطبع

- مرايات للضحك: شعر.

شركة الأمل للطباعة والنشر

(مورافيتلى سابقاً)

ت: 23904096 - 23952496

بايته معايا
لقطات من حزن قديم،
كوابيس قديمه،
ريحة ملايكة
ولادي...
مالحقتش أحضنهم

تصميم الغلاف... د. خالد سرور

Bibliotheca Alexandrina



1237442



www.gocp.gov.eg

الثنى : جنيهان